


泣血錄

完

伊藤文庫

115



市書印
名團之
兼立館



序



亡文中村武夫有此著曰述戊辰國
難之因由及我舊兼名藩君臣進退
去就出義因叙北越戰爭之槩與蓋
吾兼名藩學夙安廩

天照皇大神宮御稜於正堂闔藩師
生每朝肅拜之而后各就其業故其
尊王愛國大義之教有繁亦久矣如
戊辰之事則出於東西各藩政見之
異岐焉而非天幕之爭也固明矣豈

可曰順逆律之於此著雖一小冊子
亦足曰供洗冤之資而備良史之採
擇矣立見尙文君曾當戊辰之難爲
衆名雷神隊長頃者惜此著之湮滅
將印行之徵一言于正武於此

著所關深矣。誼不可辭。乃謹記其畧。
旨云。明治庚子新筆。

米峰小山正武謹識

蘇洞居士齋拜書

泣血錄

桑名軍監中村武夫良猛著 後稱岡本武雄

友人 米峰小山正武 同校
蘇洞江間政發

嗚呼邦家所以隆替興廢者。豈無其機哉。察古之所以興與今之所
以廢。則實有不堪流涕長大息者矣。蓋嘗察 德川氏所以興。應仁
以還。大道廢絕。群國爭雄。以戰鬥攻伐爲事。不知仁義忠愛爲何物
也。獨我 東照公起於參遠蕞爾之地。獎廉耻。黜阿佞。開言路。容諫
譚。尊 朝廷以制七道。開誠信以御群雄。重稼穡以察民隱。夫其
所務。與一時雄豪。天壤相反。安知非天生斯君。以救蒼生之急哉。其
所以開無前之業者。亦非偶然也。自 照公至 今公。代世十五。歷

歲三百。其間不能無污隆。寬永明曆。霸業益隆。七道綏帖。諸侯慎職。天下無一事之可慮也。傳至延寶。時世一變。政令大衰。享保中興。廟堂清明。賢良并進。天明之際。氣運再衰。紀綱紊亂。天下殆危矣。我樂翁公起而執事。撥其亂而反其正。實成寬政之盛。而推其所以隆替。則未嘗不由邪正之消長也。傳曰。其人存則其政舉。其人亡則其政息。前賢制法。後賢述之。所以國事月新。紀綱日振也。明主之慎於用捨黜陟。以此之故也。天保以後。奸慝邪佞。相繼執事。無復脩寬政之法者。弊政謬舉。不暇數焉。今夫樹木之折。其心先腐也。邦家之滅。其政先蠹也。今日之禍。孰知其不胚胎於此哉。當是之時。宰臣僚吏。非驕傲奢侈。則巧佞浮華。賄賂行於朝。請謁滿於家。佞己者進之。異己者排之。是亦異於 祖宗之獎廉耻黜阿佞矣。苟有正議抗論。憂天下者。則視猶仇讐。廢黜幽錮。無所不至。甲辰之夏。遂至幽水戶烈

公。是亦異於 祖宗開言路容諫諍矣。張威權以蔑天子。擁勢力以忽 朝廷。是亦異於 祖宗之重 朝廷以制七道矣。其待諸侯。大者忌憚之。小者苛使之。政治之得失。民間之疾苦。措而不顧。是亦異於 祖宗之開誠信察民隱矣。夫其所爲。盡反 祖宗之所以興。天下何以不衰滅哉。而人心未去。亂賊未起者。以 祖宗之德澤未滅也。苟使當時宰輔有察於此。反其始修其本。則寬政之隆。非不可期也。而其失者日失。而其謬者日謬。遂使草莽布衣之士。慨然憂天下之事。政權所以出於傑士俊民之手者。其機實在於此矣。然天下有可憂之勢。而無可憂之形者。其事未發也。而天下俗士。徒視其形。方以爲昇平無可患。殊不知積威所壓。僅掩其敗也。而其有事也。積威決不可恃焉。癸丑之事是也。米夷之來也。 霸府臣僚。皇然駭愕。下議於諸藩。問其可否。紛紜不決者一年。及其盟

金川。遂出於姑息。瞬昧之舉。至伺其鼻息。以憂喜。於是四方忠憤。激烈之徒。慷慨憤惋。盡集府下。欲奉霸府。以振神州之氣。而姦相汚吏。益恣酷虐。塗其肝腦。斷其身首者。前後不可數焉。戊午之事。豈忍言哉。於是先之集府下者。沛然四出。發於大和。激於筑波。迸於銀山。聚而爲壬戌。溢而爲甲子。而霸府猶不能反其始。以支其勢。方務於促敗之計。於是東西分裂之勢成矣。成而不回。日降月衰。遂以爲丁卯之事。是其所以然者。由天下俊傑不在東而在西。而其所以歸西者。我自失之也。故戊辰之事。始成於此也。其機實兆於戊午矣。世道之變。可勝嘆哉。

先是。慶應三年十月。前將軍請解職還政。朝廷許之。於是普召諸藩。欲問其善後策。諸藩未全至。初。前將軍與會津侯。以壬戌之歲。出護京師。我。中將公。以次年出任京師所司代。時天下正多事。幕

府日衰。三公苦心焦慮。欲回天日於既墜。憂勤勞苦。無所不至。而時移勢變。加以大喪。遂至於此。天下莫不悲之也。先是。或說前將軍曰。閣下識今日之勢乎。我不先則彼先之。先則制人。後則制於人。且薩人專橫。天下莫不憤也。閣下宜表罪於天。闕斷然伐之矣。反積衰之勢。必在今日。閣下願察之。前將軍不從。至是又說曰。閣下不見彼蛟龍乎。當其得風雲。飛揚九天。日月爲暗。至其失風雲。機變盡廢。神術盡去。爲龍者。宜深藏於淵窟。長其鬣尾。磨其爪牙。以待風雲之會也。不然而彷徨失其處。則必爲漁人所羅矣。今閣下已解其職。是猶龍失風雲也。而關東八州。是閣下之淵窟也。閣下宜速還馬。脩其甲仗。儲其糧食。以待其時也。不然而眷戀依違。欲再復其權。必有不測之禍矣。前將軍又不聽。至是東西之勢益逼。京畿騷然。十二月九日。薩藩急起兵擁闕。解關白二條公之職。將軍會津侯

與我公皆停參。朝諸門守衛。一切代之。京師大擾。或建策曰。西人暴橫。我兵怒如火。宜依其勢用其鋒。決死奮鬪。決輸贏於一戰也。苟失今日。人心怠廢。不可復用。或曰。京城逼迫。大兵不可用。今我多而彼寡。勢甚不可矣。不如退據浪華。得海陸之勢。以徐爲之計。朝廷又使會桑各就其藩。前將軍遂去京師至大阪。我公與會津侯皆從焉。時十二月十一夜也。先是。莊內留守江戶城。薩兵以江戶三田邸爲根據。召聚浮浪之徒。大剽掠府下。又劫擊莊內之營。莊內遂以十二月二十五日。擊三田薩邸燒之。報至大阪。前將軍蹶起欲出師。麾下浮躁之徒。又恣憑舉兵。會津與我藩。皆不知也。而出兵之令已發。四年正月二日。諸軍結束發浪華。分自兩道進。前將軍親書訴冤。會津爲伏見先鋒。竹中丹後督之。我兵與幕兵爲鳥羽先鋒。松平豐前守督之。兵凡萬餘人。絡繹相繼。而兵無律度。識者患焉。聲曰。前將軍將朝。先遣前衛。

兩道之兵。將以其三日入京師。西軍出兵扼之。幕兵進自鳥羽者。先爲其所誘擊。敗還。伏見戰已酣。烟焰漲天。砲聲震地。四日黎明。我兵進衝敵。敵伏竹叢中。而我兵四面皆火。爲其所狙擊。幕兵聞我急也。疾驅來援。再進衝敵。時天已明。東軍大喊進攻。砲彈銃丸連發如雨。山川盡震。西軍不能支。連奪其三柵。東軍戰疲。因收兵。會伏見兵敗還。兵勢大挫。西軍又進。東軍退守淀。會兵短兵進破敵。追至下鳥羽。幕兵代守之。已而又失之。於是幕兵與會津我兵在淀。大垣與幕會在八幡。我兵與幕兵在橋本。五日淀破。六日。西軍進攻八幡。戰已酣。津藩叛。卒起襲橋本。我兵叱咤。據壁禦之。八幡兵聞其戰聲。惶惑顧望。畏歸路絕。棄守而退。西軍進出橋本背。東軍腹背不能支。全軍大敗走大阪。大阪聞敗。更出兵守杜口。此夜。前將軍以會津侯我公板倉侯等。海上走江戶。初敗聞至大阪。前將軍會衆謂曰。今日之事。非好爲戰也。若其誠意。前

書審之。不幸旨趣未達。事遂至於此。是實終天之遺恨也。然誠心赫然。俯仰無恥。寡人唯應殉於此矣。關東忠義之士。豈莫繼其志者哉。汝等其體寡人之心。衆莫不悲慟。而事遽至於此。全軍愕然。遂大潰。初榎本和泉守將開陽艦在攝海。擊薩艦破之。將有所建議。上陸至大阪。前將軍已走。重器秘書。狼籍於坐間。泉州流涕。收之而去。至港口。艦亦爲前將軍所駕去。泉州大息。急乘他艦。走至江戶。於是諸軍亦以其七日。出大阪。走紀州。我兵躡自櫛本航伊勢。行至志州。爲風浪所阻。諸船分散。或至桑名。或至參州山下。而桑名已爲西軍所襲降。於是人心瓦解。部衆潰散。至二月。我兵漸入江戶。先是。前將軍與我公會津侯。以十一日至品川。公不敢入邸。寓一橋府及會津邸。晝夜上殿說大計。前將軍不從。謹慎請罪。公遂歸於築地邸。江邸有司相議曰。桑名已降矣。公不宜不謝罪。於是託謝書於肥後藩以請罪。及我兵至。

公大悅。直延見勞之。當是之時。邸議甚不振。有志之士莫不憤惋。於是乎。恭順恢復二論起焉。恭順論曰。珠光夫人。萬之助君在敵中矣。公而謀再舉。兩君之事未可知。是使公負不孝不友之罪也。且公家進退。不宜不從。德川氏。今德川氏請罪。而我議再舉。不特負兩君併不奉。德川氏也。不如恭順以聽命於天。恢復論曰。王政復古。順逆顛倒。倫理錯亂。是無他。以奸人欺罔。天聽也。夫時勢如此。而忠義之士。莫一人起而掃之者。則列聖神靈謂之何。且夫欲奉德川氏者。宜問神祖之意。何如也。今天下之事已如此。而莫一人謀恢復者。神祖之靈。其謂之何哉。前賢有言。忠孝不兩全。蓋臣子之至變。處之至難也。然又說處之之法。曰。唯其所在而致死。故臣子之報君父。唯顧其緩急。何如而已矣。今日事已至於此。公之進退。不言可知也。唯其不失大義。所以忠孝兩全也。既而前將軍入上

野。若年寄下書。諷公入院。有志反復爭之。不能得。既夜。憂憤不寐。乃密上封事於坐右。略曰。正月來。國家多難。閣下寐不安席。食不甘味。實臣子之所不忍言。而今又有入院之事矣。臣等聞之。益悲焉。日月之明。浮雲蔽之。閣下之恨可知也。抑國事至於此。人心未定。正議未振者。國是未決也。今入院之事。至痛極矣。是宜振其氣之時也。閣下請以是時。面見衆士。出哀痛之令。以明尊意之所在。庶幾可以定人心。明方向。以爲他日興復之地也。公嘉納之。即日下令。延衆於書院。人賜神符一枚。以禱其福。有頃。公出面曰。東下以來。撫恤不如意。衆苦可知也。寡人將以今夕入靈岸寺。公家先塋所在汝等宜益自愛。真審其勢。以謀報國也。衆莫不感泣。是夜。公遂出邸。於是同志相謀曰。吾輩數爲國家謀。而未嘗有益於事者。聲力微少。不足以壓群言也。今邸中固不爲無有志之士。合從結義。則廷議何有不破哉。乃傳檄約會洲崎八幡

官者。凡三十餘人。因反復論辯。欲同心戮力。以雪君冤。衆皆誓必死謀事。於是淋漓痛飲。極快而止。自是正議漸振。當是之時。西軍兩道逼江戶。輪王寺官親至駿府。見有栖川王。明天下之大計。欲以和東西。西軍不聽。前將軍益恭謹。會津侯莊內侯皆命就藩。有志議曰。事已不可爲矣。公宜就柏崎。以徐謀恢復也。而邸議未決。西軍已越箱根。據神奈川品川。以臨府下。邸中洶洶。議論紛紜。有志憂憤。日夕會靈巖寺謀事。公嘆曰。寡人自幼。一意奉天幕。未嘗有他心。及其就職。憂勤勞苦。天下亦知之。而今以逆名終。是終天之恨也。而有司亦以母弟爲言。寡人安忍失孝友。以自專哉。有志聞之。哭曰。兩君在西。而請親裁。是教公恭默就死也。臣子之義。宜謀其安危。以請進退也。於是窃有所決。既而若年寄大久保一翁傳將軍之意曰。公在府下。理勢有不宜者矣。宜就僻遠之地。恭謹待朝裁也。於是議初決。公

遂以三月八日。出院至邸。乘普國商船航越後。泊橫濱八日。十六日發港。二十三日達新瀉。晦日至柏崎。從者可百人。自餘經會津。陸路至柏崎。先是。自鳥羽山下。脫走桑名者甚多。至是。或伏府下。或走桑名。能至越後者。不過其半。於是同志相議曰。鳥羽之役。我兵戰甚不力。桑名又有開城之事矣。今日江戶有守城之事。而我藩臣隸。不有一人致命。則何顏見先公於地下哉。吾輩宜一死。以謝天下也。衆皆可之。或曰。吾所見異於此。今國勢未定。欲爭衡於天下。非有志大致力。則事決不成也。而吾輩盡留於此。則是君側無正議也。姑息之士。必將拍手而賀。議論未定。敵兵卒然有逼。則我輩苦心。亦爲水泡矣。宜分同盟爲二。拈闔以決去留也。一則得以報德川氏。一則可以定君側也。衆皆不從。同志六十餘人。盡留於江戶。欲以有所爲。既而西軍漸入江戶。衆遂出築地邸。入彌勒寺橋。大久保主膳正邸。假稱七聯士官隊市中取締。隸八田得藏。衆推佐藤武介。本名町田

老之丞後改武須計爲隊長。推嘉澤勘介。本名田副嘉太夫爲副長。定部伍之法。既而西軍傳命。負重罪者。亦特減死一等。近藤勇適敗於流山。大久保素依近藤。於是意氣大沮。嫌庇衆於邸中。我兵乃移於小川町步兵屯所。又稱四聯新士官隊。當是之時。前將軍一意恭順。麾下八萬人。率皆屏息退居。雖有官守者。往往至廢登城。獨海軍奉行榎本和泉守與陸軍奉行松平太郎。慨然以安危自任。東國忠義之士。從者如雲。我倉田巴。本名立見鑑三郎。現稱尙文。國枝太郎。本名馬場三九郎。鞍平次郎。本名河合德三郎。後稱武德。亦參德川氏陸軍事。以贊守城之議。四月五日。西軍奉天使入江戶。命收封開城等五事。泉州與太郎。密決大策。哀訴數事。會奸人白戶石助。報其議于上野。前將軍大怒曰。是猶加刃於我頭也。立召松平等於上野。盡奪其職。九日。前將軍出上野至水戶。西軍遂入江戶城。實四月十一日也。江戶城宏壯堅固。糧食如山。兵仗百萬。而爲一奸人所沮。以

至於此。志士莫不流涕也。江戶城已降。於是關東忠義之士。盡出江戶會市川。曰傳習第一大隊。會人秋月登之助將之。曰第二大隊。大鳥圭介將之。曰七聯隊。米田桂次將之。曰御領兵。加藤平內將之。曰回天隊。相馬左金吾將之。曰別傳習隊。會人秋月登之介。工藤衛守將之。曰貫義隊。松平兵庫頭將之。曰草風隊。天野加賀守村上求馬將之。曰純義隊。山中幸治將之。凡二千餘人。於是衆議推大鳥圭介爲總督。土方歲三爲參謀。各隊揭大旗。題以東照大權現之號。發書誓衆。欲行至日光謁神廟。以舉義兵。部署已畢。於是一軍進自街道。曰傳習第二七聯分隊。誠忠隊。純義隊。大鳥爲之總督。一軍進自小山。曰傳習第一別傳習七聯分隊。與我兵合千餘人。秋月爲之總督。土方爲之參謀。草風貫義。有故先進。時四月十三日也。當是時。西軍據宇都宮。所在出兵。西倚江戶。東臨會津。十六日。貫義草風。進至小山。西軍張兵要之。二軍擊

而破之。敵走保室川。傳習繼進。又破之。十七日。敵復出兵於小山。傳習奮鬪。遂盡破之。斬獲頗多。而間道之兵。已進逼宇都宮。十八夜。秋月與我倉田等。渡帛川。次蓼沼。十九日。諸軍結束。攻宇都宮。我兵爲先鋒。秋月爲中軍。回天諸隊爲後衛。敵候騎在城東曠野。望我至先走。諸軍益進。敵張兵於郭外郊野以要之。我兵乃大張左右翼。進而環之。砲隊擁神旗。自中央進。敵辟易退走。我兵追躡。放火城下。我神山金次郎進斬一人。敵益潰走保城。乃轉逼城東門。敵必死固守。相距十步。彈銃觸擊。敵舞槍來逼。佐藤武介振壓叱之。敵兵逡巡。石井勇次郎不暇拔刀。揮銃殲之。三木十左衛門進斬一人。小林權六亦斬一人。中丸而死。敵據險苦戰。死傷相當。我知其不可遽拔。乃左轉出敵背。放火郭中。城遂陷。廿日。街道之兵。至自小山。大鳥先諸軍。鞭馬入城。於是大會諸軍於牙城。置酒舉凱。獨山中幸治與渡部綱之助。後諸軍而發。次關宿。西軍

進圍之。幸治遂降西軍。西軍斬而梟之。渡部走至宇都宮。此役。我兵銳武冠諸軍。其拔城爲先登第一。而號令明肅。馳名稍奮。乃督市中警非常。西軍聞小山之敗。大驚。急發其土佐及因州等精兵。自江戶至壬生。廿一夜。壬生藩友平某來告曰。敵雖至。守備未全。今夜襲之。必有大利。諸軍乃侵雨至安塚。敵已置兵。共戰不利。而別軍進自間道。出其不意。敵不察其爲敵。遂大敗之。奪其輜重。追至壬生而還。於是出于王新田以扼敵。請我士官督之。多賀逸之助馬場清次應之。二十三日。敵進自間道。急襲宇都宮。時諸軍守衛頗怠。敵已傅壁。我兵急與七聯隊出守明神山。入幡山。自辰至午。城中請援於我。我兵乃分入城。多賀等聞城下戰聲。疾驅還救。敵遂退走。我兵出城追之。敵之援兵又至。我兵退。敵復蝟集傅城。大鳥謂諸軍出江戶。以至日光爲志也。且恢復之事。前途極遠。不可專致死於此。遂棄城而退。明神山爲宇都宮之要勝。我兵據險。

扼之。敵遂不能尾。殿而退。二十四日。諸軍盡至日光。謁神廟。倉田國枝等與我隊帥。皆欲一戰。張兵勢。衆方憂君側。欲速赴越後。遂辭諸軍。踰高原之險。東入會津。會松平太郎至。自江戶。竊有所諭。於是諸軍亦去。日光入會津。初。我山田勘介本名山脇。左衛門。扈公至柏崎。數陳大計。不決。至是奉命使長岡。因入會津。旣而聞我兵至。大喜。即裁書。具報柏崎之狀。請速至。致力。時我兵已至。見依。佐藤倉田等得書。大驚。乃與松浦國枝。鞍三子議。留嘉澤護衆。兼行疾驅。閏四月九日。始至柏崎。時公屏息在勝願寺。五人至。大喜。直召見之。先是柏崎議論紛紜。而西軍已發京師。信州諸藩。應徵出兵于勁城。大夫吉村權右衛門。遂爲有志所殫。然議論猶未決。雖有志之士。亦不能爲計。特欲一死成仁。及五人至。議論始決定。十二日。我同志盡入柏崎。即時謁公。公惻然。吊死繼亡。即夜大賜酒肴。勞之。衆莫不感奮。柏崎人心翕然大振。十五日。公命勝

願寺設大法會。親吊鳥羽以來死事者。即大改兵制。以軍事奉行。立見鑑三郎大目付松浦秀八。現稱橫目町田老之丞爲隊長。以軍事目付富永太兵衛橫目馬場三九郎大平九左衛門爲副長。以山脇十左衛門爲軍事奉行。處分已定。公以其十六日。徙于加茂。當是時。西軍已發高田。左軍據青海川。右軍據小村嶺。翼兵據谷根小菅。以逼柏崎。於是立見督一隊據婦入阪。松浦督一隊據廣野嶺。町田督一隊出大河內。而衝鋒隊。幕府步兵古屋作左衛門之所率而會津士官木村大作山浦鐵四郎等監督之出上條口。扼小村之敵。兩陣相持未戰。小河內有城山。可以瞰敵營。町田欲俯擊拔敵營。奪米山以臨頸城。乃與立見馬場。僦土人熟地理者。以二十六夜。冒大雨上山。瞰敵營。敵營炬火如星。自谷根連青海川。三人大恠。望見良久。及曉。炬火漸滅。而鯨波砲聲大起。三人大驚。輾轉下山。走至鯨波。此日味爽。敵乘曉襲鯨波。我斥候退。敵進火鯨波。一軍上廣野嶺。一軍向婦

入阪。立見督衆奮鬪。相澤安兵衛富永在柏崎。以所部來援。我奇兵擊走廣野嶺之敵。婦入阪之敵動。立見馬場叱咤益振。敵稍退。二子拔刀大呼。下山奮前。敵益走。追至鯨波。驛中斬馘數人。復收據山。敵亦據鯨波。戰自卯至戌。敵兵力屈。所在放火而退。松浦以此役傷小村之敵。聞敗不敢來攻。我兵方議攻守之計。而小千谷之敗聞。遽至柏崎。遂徹鯨波之守。至柏崎。休憩一夜。敵懲敗不敢至。二十八日。去柏崎。次妙法寺。此役薩長加州高田等千餘人來攻。我兵僅四百。器仗弊惡。敵死傷五十餘人。我死傷不過十餘人。朝日山役。得敵所齎手簿。以故審之。五月朔。新定隊號。立見所部曰雷神隊。松浦所部曰致人隊。町田所部曰神風隊。立見出屯赤田。馬場屯大塚。町田屯內方。先是水藩市川三左衛門朝比奈彌太郎以所部六百人。脫走在出雲崎。鯨波之役。來援至荒濱。二十八日。進攻柏崎。不利。退守椎谷。六日。敵分兵爲二。左軍自宮川攻椎谷。水藩兵戰敗。

右軍自春日攻赤田。富永以半隊當前面。立見以十餘人。山道出敵背。急擊之。敵狼狽而退。馬場謬聞赤田戰敗而退。初三國之役。會藩士官以幕兵數十人守之。以故輒敗。會津隊長佐川官兵衛土屋總藏等。各以所部兵至。二日。進攻片貝。不利。退入長岡。於是馳使招我兵。欲俱衝小千谷。我兵不欲退。佐川等欲踰信濃川而南。使者向背相望。遂收兵而退。七日。入長岡。先是長岡老臣河合繼之助。至小千谷。見西軍參謀。爲陳天下大計。不聽。乃歸勸兵。會我軍事奉行及三隊長佐川等。議進取之計。十日黎明。諸軍結束。發長岡向妙見。佐川以所部。自本道進。町田與會津萱野隊遊擊。踰金倉山之險。自間道進。長岡爲之嚮導。敵前軍越信濃川。據榎嶺。後軍隔河而陣。本道之兵爲其所挾擊。不能進。長岡兵先進。先退。遊擊隊繼至。吶喊直進。町田下澗應之。擊其右翼。至夜奪之。檢其遺仗。知敵之爲長州奇兵隊也。本道之兵乃進。敵怒榎嶺之

敗也。翼曉奮前來攻。神風致人與會津長岡二兵。三方挾擊破之。朝日山在榎嶺東南十餘丁。最爲險要。長岡兵四百人與會津兵二百守之。河合憂長岡兵不習戰。請我士官督之。立見與其軍監馬場清次應之。率雷神半部隊至朝日山。馬場中丸而死。十三日。敵乘曉霧襲朝日山。會兵三十餘人。爲前衛陣。山西輾轉潰走。敵兵追躡。鼓聲鏗鏗。殊死肉薄。拔刃相薄。長岡兵畏縮不能戰。會人伴百悅等。欲棄營而走。立見叱咤督四十餘人。乘壁死鬪。遂大破之。時我兵在榎嶺者。隔澗望之。見會兵走。欲急救之。而斷崖絕谷。不能遽至。衆莫不扼腕。追兵益進。至半腹。而山巔噴烟大迸。飛彈雨注。追兵不能進。上下格鬪。自卯至辰。我砲隊隔澗擊之。敵遂壞散。此日雷神死傷八人。敵死傷三十七人。其長山根辰造傷。時山直入死。旣而會兵檢死尸。獲時山所齎手簿。乃知來攻者爲長之奇兵隊也。我兵旣數有利。兵鋒益銳。乃將南取。小出島。以掎小

千谷。會有長岡人應敵者。具告我虛實以誘敵。十九日黎明。敵踰草生津渡。入長岡城下。所在放火。時諸軍皆出守。妙見朝日山。在者甚少。河合督衆苦鬪。身自射砲。我砲隊亦力戰數合。而衆寡不能敵。烟焰遍城下。城遂陷。乃奉牧野侯走會津。我神風時次旭村。聞變直還救。不及。妙見遂解兵。二十日。越灰燒山鋸嶺之險。至半藏鐘。雷神自朝日山。直至椽尾。此役霖雨連旬。諸軍皆起臥泥淖中。而意氣益振。西軍以數倍之衆。亦不能力爭。西取與板以爲犄角之勢。微我軍內應者。事未遽至于此也。二十一日。諸軍會椽堀議事。時我軍後援不繼。盡欲棄中越後之地。二十三日。佐川官兵衛次杉澤。西軍尾擊襲之。佐川苦戰解圍。致人聞急赴援。戰已解。於是致人屯鹿嶺。雷神神風次大崎。先是奧羽列藩憤薩人之專橫。合從同盟。欲正其罪。閏四月十八日。議始決。於是會津督白河口。仙臺督磐城口。莊內專當秋田口。而米澤上杉主水爲越後

口總督。色部兵部甘糟備後芋川大膳千阪太郎左衛門田丸左京各以一隊。中條豐前督之。凡二千餘人。與莊內石原多門神原十兵衛中村七郎右衛門上山松平誠之進等至越後。於是兵鋒復振。乃會加茂議進取。因分兵爲三。會津米澤長岡等爲左軍。向長岡口。我兵與會津上山村上等爲右軍。向與板口。莊內與會津水戶山形爲翼兵。向出雲崎。二十四日。諸軍盡發。加茂。二十五日。左軍先鋒與敵戰。大茂破之。此日我三隊自大崎鹿嶺。進至三條。二十七日。諸軍結束向與板。致人分兵。與會津上山村上。自本道進。神風與致人半隊會津萱野隊。自間道進。雷神屯黑阪。備島崎之敵。敵分兵。正兵據金崎。奇兵據雷塚。扼之神風伏林。壓敵而陣。致人繼至。敵射彈試之。我兵不應。敵不以爲意。有頃。會兵出林。大喊應之。敵陣色動。致人副長馬場三九郎。神風副長大平九左衛門。下谷直進。敵亂次潰走。長府隊長勝原國助。叱咤制走者。馬

場單身薄之。拔刀自名。勝原發拳銃者三。皆不中。馬場追及。大喝擊之。傷頭。又擊斬拳。小池勇八繼至。敵益潰。神風半隊。回山右向雷塚。敵方備其面。不察我卒至。神風疾驅擊其橫。敵遂潰走。二十八日。雷神侵曉攻鹽入嶺。不拔。轉出本道。神風致人繼進。自雷塚會兵先進。再攻鹽入嶺。我兵轉出北野。欲直進出敵背。而聞敵將以此日午時入島崎。町田乃分其半隊。據北野以扼之。火根小屋荒卷。而進出鹽入之右。敵顧而動。會兵乘之疾擊。敵遂走。我兵吶喊。又衝大山。是時本道之兵。正與長之奇兵。戰于遠浦。北野亦戰起。砲聲三面震地。我兵疾擊。又拔大山。追躡至陣峰。敵五十餘人。在陣峯之東。因又相戰。而我兵僅十餘人。又聞島崎之敵襲我後。會烟焰隔澗而起。衆謂與板已拔矣。窮寇無追也。乃退保大山。島崎之敵適至。我兵誘擊走之。而敵復據陣峰。北俯大山。東臨本與板。是時正兵已拔遠浦。殆拔與板。至是爲其所俯擊。我軍

監鈴木右衛門七山內半平等盡死之。乃退據遠浦。至夜。北野之兵亦破敵而至。馬場三九郎憤失陣峰也。欲直前奪之。諸隊帥皆謂。不如潛廻山襲其翼。雷神神風與會津上山。以二十九夜。下大山次根小屋。六月朔。侵晨出小島谷。至阿彌陀山。敵已設備。雷神右轉向備後山。敵亦置兵。共戰不利。副隊長大平九左衛門中丸而死。未牌收兵至小島谷。立見欲直出寺泊。與莊內合襲出雲崎。會津等不從。我軍事奉行亦傳命罷兵。乃退。雷神次根小屋。神風次北野。二日。敵五百餘人。自島崎襲北野。雷神三十人爲左翼。守荒卷山。神風廿人爲右翼。守北野。敵斥候先進。神風擊殲一人。敵兵踏踞。而後隊益進。北野荒卷地勢高於島崎數丈。樹木掩身。而敵益肉薄。自田中進。我兵甚便瞰射。殺傷數十人。敵恃衆不屈。更進烈射。砲隊又據富岡山射北野。我兵不動。敵又欲轉出荒卷之背。雷神擊走之。既而會兵百餘來援。而戰不力。於是欲約莊內

夾擊。乃馳至寺泊。初寺泊之兵欲救北野。敵進瀛船。爲進取之勢。斥候又報。敵進至山田。於是遣兵拒之。而敵不至。却聞島崎砲聲如雷。乃知爲敵所欺。直馳至島崎。島崎戰正酣。乃據其北山俯擊。敵大驚。因進火島崎。敵益狼狽。遺棄糧仗。走出雲崎。此日。左軍又拔見付中島。四日。會兵進入島崎。我兵進入小島谷。於是我藩驍名冠諸軍。時人謠曰。第一桑名。第二佐川。次之者衝鋒隊。會津所帥諸軍休憇數旬。人思一戰。二十四日。神風雷神發小島谷。與會莊合襲乙茂。會兵據馬草山。我與莊內據木理嶺。瞰射乙茂。敵右軍築壁據村。左軍據村拒之。戰自午及酉。敵善拒。我軍監中島角左衛門等死之。會人欲收兵而去。我隊帥不聽。曰。今諸方之敵。據險設壁。欲強拔之。其損兵極多。不如蠶食以張兵勢。今此地雖深入敵地。築壁據之。何不可守之有。且夫不進則已矣。進而又退。其損兵氣亦甚矣。會莊皆可之。於是我與莊內中村七郎右衛門。

以日浦及中村營。築壁於木理嶺代守之。會人西鄉源五郎亦設壁據馬草。二十六日。敵襲日浦之營。神風擊走之。敵尋襲日浦者再。雷神擊走之。敵不復出。於是東西對壘。不相決。積至五十餘日。左軍據福井大黑椽尾。盛立。漸逼長岡。右軍當乙茂高畑者。爲馬草木理嶺日浦之營。雷神神風與會莊守之。其當本與板原陣峰者。爲馬越大山之壘。致人與會水分據之。以蹙與板。翼兵當久田落水者。爲山田村田壘。會莊水守之。以臨出雲崎。而翼兵不過四百。右軍纔五百人。左軍會津米澤長岡等二千餘人。皆無後繼。而軍氣日振。人民亦悅服。爭餽賣酒食魚餅。營外常爲市。陳峰最爲與板之要衝。其地山陵數仞。甚便瞰射。以故我兵數損。副隊長馬場三九郎亦歿于此。乃以軍監鳥飼次郎爲副長。日浦最斗入敵中。分兵四面蹙之。我兵臨機善拒。敵不能加。於是謀招海軍於江戶。以衝高田今町。而海軍未至。初我去柏崎也。中將公發加

茂至津川。供俸甚薄。而其吊死撫傷極厚。傷者至津川。公必親臨慰諭。屢賜饌具。又親祈諸臣之福。贈神符於軍中。衆莫不感泣。至是。輪王寺宮間行至與州白石。會津侯發使招公。公去津川至若松。東西久相對。軍士疲行伍。土民困供給。長岡老臣河合繼之助。誓欲復城下。擇死士七百。發書誓衆。以七月二十四日三更。結束徑稻田中。潛入敵中。人民爭應。所在放火。喊聲如雷。不知其幾千萬。敵狼狽不知所出。正兵繼進。自大黑內外夾擊。敵益潰亂。糧仗死傷。遺棄奔竄。風聲鶴唳。猶疑其爲敵。城下之民。爭荷酒食而迎謁。而河合遂以此役重傷。當此時。我兵氣旣振全越。左右二軍。將刻期大舉進擊。而其計忽乖違者。以新發田藩叛盟也。新發田夙與會津米澤相疎。而其領民亦多屬意於西軍焉。以是遂叛盟。具告我虛實。請爲其導。西軍乃發六瀨船。潛航松崎。入新發田。新發田以城降。水原五泉新瀉盡陷。敵轉向羽州。聲言大兵。

入米澤。米兵聞之。震懼落膽。欲棄守歸國。我軍事奉行山脇十左衛門。單騎馳至見付。說千阪太郎左衛門曰。今敵艦一衝虛。而諸方盡解守。是自陷敵計也。善爲計者。反禍而爲福。今敵兵深入。後援不繼。諸方各置守兵。轉旆北向。殊死奮鬪。薄之。敵兵可殲也。我藩請爲前驅。以折其衝。今日之事。實天下勝敗之所決。願熟慮之。且夫四月來。諸藩之兵。爲國委命者數千。遂得至於此。今一敗盡棄之。豈不愍死傷之士哉。千阪依違不應。山脇大息。乃約與會長。左右攻擊。陷與板脇町。乘銳北向。將以明晨發。敵先以二十九日。自中島襲見付。米兵瓦解潰走。自見付至大茂。一時盡失之。長岡亦遂棄城下而退。右軍結束旣終。而左軍敗報適至。衆切齒扼腕。不復及也。八月朔。寺泊日浦大山盡解兵。高畑之敵。諜知之。急起襲日浦。雷神擊走之。旣而至小島谷。日浦中村一時火起。衆爲之悵然。乃退次三條。初我軍事奉行奉使在津川。聞新發田有異。

志請迎其藩主于津川。會人不應。行至水原。又勸之。會人辭以暴舉害衆心。奉行曰。是無難也。宜說新發田言。貴藩丹誠夙亮之。然人或謂貴藩有異志。夫三軍之敗。起於狐疑。貴藩已感吾義。則願奉主侯於津川。以鎮衆心。其如斯。則何暴舉之有。會人依違。及米澤至。越後新發田大動。諸藩議將移兵伐之。新發田遂出兵于長岡口。戰亦頗勦。諸藩不復疑。以故遂至于此。於是諸藩議欲保三條。以東。雷神致人當守黑水鹿嶺。二日。先發。神風欲與莊內守加茂。繼而發。會兵留守三條。敵已據河東。伺我之過。要之。神風進。三據竹村。擊其橫。會兵聞戰起來。援敵分兵。要之水戶。神風分兵救之。水戶村上。等不戰而走。戰自己至。成。敵遂退。我兵亦知不可守。乃棄三條。至加茂。神風爲殿。於是雷神與莊內守黑水。致人欲守鹿嶺。爲敵所據。不果。乃與神風守加茂。會兵進屯保內。至是。西軍三面合爲一。併全越之兵。以臨加茂。東軍震懾畏縮。望風潰亂。

我與會津莊內僅五百。決死相守。四日。敵自大崎進攻保內。會兵不戰而潰。敵大喊追躡。欲直入加茂。勢如風雨。神風據壁不動。攢銃齊擊。敵兵踣踞。據福島村。相距百步。散彈如霰。聲撼天地。我兵不屈。敵別軍自鹿嶺間道襲加茂。神風據險設壁。敵不察而進。殺傷無數。致人時在加茂。聞急來援。我軍益堅。敵又自天神口。將襲加茂。致人舉火而退。敵進入焰中。致人狙擊走之。而村松已陷。四面皆敵。勢不可復爲。五日黎明。遂收兵而退。衆皆期必死。敵亦不要也。行次高石。輜重乏絕。遂踰沼。越至津川。先是。諸藩之兵。皆各番交替。獨我兵自甫臨戰。決死奮戰。未嘗一日休憩。能以寡兵破勁敵。未嘗敗衄。東北之戰。北越最振。而我兵力居多。列藩皆以爲不可及。至是。所領之地盡失之。遂發津川入會津。時八月十日也。當是時。磐城二本松已陷。而會津仙臺之兵在白河者。亦甚不振。於是我兵將赴援。未發。敵自二本松急攻石席。會兵守者甚少。

屢敗。猪苗代亦陷。我三隊急赴援。次大寺。會津侯與我公親將出瀧澤。二十三日。瀧澤亦敗。敵薄若松城下。放火燒之。會津侯鷹。公使去。公固請共守。侯不聽。公遂與侯訣。北赴羽州。三隊望城下之火。皆謂公在城中。乃還救。敵已圍城數重。雷神先進。致人爲次。神風爲後。立見等拔刀肉薄奮前。殺傷十餘人。刃折。奪刀又進。敵解圍。轉向我。大戰馬喰町。我兵殊死血戰。必欲達城。殺傷無數。而我副隊長鳥飼次郎等十人亦死之。戰自己至未。我軍無後繼。敵益蝟集。城中亦不應。遂不能達。退至鹽川。於是始知公北行之事。乃馳至大鹽。米澤已叛盟。閉檜原關。以絕會仙之路。我兵請假路。不聽。因滯大鹽旬餘日。大鹽僻鄉。地不生粟。仰給於外人。民又逃竄。糧食乏絕。兵大苦。我公至米澤也。欲見上杉侯請援。侯託疾不見。遇之極無狀。乃東至白石。欲謁輪王寺宮乞援。時宮旣在仙臺。聞小笠原壹州在福島。乃轉赴之。時壹州

與莊內上山等謀直衝二本松以救會津。及公至大喜。請公爲總督。公固辭。壹州不聽。乃遣使招我兵。我兵再請開關。米澤終不肯。於是以前九月十日。絕檜原嶺。度細徑而東。晝夜兼行至福島。公已不在。先是米澤大兵至福島。自明其事情。請公速去福島。時我兵侍公者僅二十餘人。畏事變卒起。十日夜。奉公至仙臺。諸藩之兵亦漸就國。獨小笠原侯與莊內中村七郎右衛門猶在福島。及我兵至。益銳意謀合兵襲二本松。米人又說福島降之。我兵益怒。欲先屠福島。然後及二本松。時小笠原侯在桑折。山脇十左衛門至桑折議事。會仙臺亦降西軍。山脇長嘆。乃將辭諸藩。殉公於仙臺。小笠原侯亦知事不成。東走仙臺。先是莊內以五月中陷新莊。略最上。轉戰入秋田。矢嶋本莊龜田等盡陷。乃長驅向久保田。連戰無前。西軍走保久保田。當是時。奧羽列藩盡降西軍。獨莊內屹然不屈。請我就國合力。我亦知莊內可爲。乃

遣使於仙臺報事情。請公就莊內。十四日。與莊內自白石北入羽州。已至山形。衆謂應與公會于此。而公未至。又遣使於仙臺。行次寒河江。時西軍已自越後入羽州。米澤上山山形皆降。西軍乘勢。十九夜三更。發山形急襲寒河江。二十日曉。大霧不辨咫尺。敵乘霧疾驅來襲。我兵朝餐僅辨。倉皇出拒。兵不滿百。敵鉞雄銳。乃走據長岡山。敵尾擊自田中進。益進環山。相蹙十步。彈銃備擊。我遂不支。退據慈恩寺。又拒之。敵不能迫。乃收敗兵而退。此日苦鬪激戰。殲敵者數十。而我軍監谷三十郎町田鎌五郎等十九人死之。神風當守左澤先發。聞敗還救至白岩。會敗兵至。乃與莊內。夜踰折肘之絕險。至古口。乃熾舟至清川。雷神致人守清川。神風分兵守木澤中村。當是之時。奧羽六十餘郡。盡瓦解降西軍。其不降者。獨會津莊內而已。初瀧澤之敗。會兵盡解四境之守。還救城下。於是西軍東自白河口。西自八十里越。北自津川口。南自

日光口。四面蝟集。圍若松數重。攻擊日益急。城兵僅不滿四千。糧仗又乏絕。而決死奮鬪。數出惱敵。西軍以數倍之衆。攻圍一月。遂不能拔也。奧羽之敗也。莊內亦盡徹境外之兵。退守國境。於是西軍北自秋田。東自最上。西自越後。盡銳相逼。先是我軍事奉行。自山形先至莊內。議攻守之計。我兵將西守越後口。未發。此月二十三日。會津遂以城降。至是米澤遣使於莊內。說曰。會津城守三十日。足以折天下之鋒。而遂不免智竭力屈者。是非戰之罪。以時不可也。今尊藩之武。已奮天下。而四隣盡叛。救援已絕。以有盡之兵。當無限之敵。其終恐智力共屈。至是悔之。蓋亦遲矣。今西軍深畏尊藩之技量。必不能有加也。尊藩盍審時解兵乎。二十八日。莊內遂降。於是移我兵于封內大山。以待朝命。而我公遂不至。初東北戰方酣。我軍威日振。北越乃發使數招海軍。糧本不應。既而西軍先發其海軍。東拔磐城。陷二本松。北略新發田。取村上。

與羽震駭。糧本蹶然。帥十一漁船。以八月十九日。發品海至仙臺。時與羽同盟已破。列藩盡降西軍。我公與小笠原侯板倉侯在松島。輪王寺宮在仙臺。遣使勸降西軍。公等不肯。乃與糧本松平等。蟻自寒澤上鷺木。與西軍戰在川克之。拔松前取箱館云。

傳曰。有天地則有人類。有人類則有三綱。人性之所以別諸物者。以是也。夫我公與會津侯。以東照公之神胤。而不幸當今日之變。其所以致身力者。豈得已哉。乃如譜代恩顧之藩。莊內長岡等。蹶然奮起。擲其社稷。棄其臣民。而不顧者。德川氏之恩不可負。臣氏之義不可失也。視之其依勢失節者。其榮辱果何如哉。且如我藩。以公言之。則母君介弟在敵中矣。以臣言之。則父子兄弟。恩義已絕矣。而鼓一旅之衆。據彈丸之地。崎嶇間關。越後敗而不屈。會津陷而不降。米澤反而不撓。流離艱難。至其不可爲。而後已者。其苦心實在

紅淚萬行之中矣。而天下議者。或曰叛矣。或曰賊矣。夫天子之不可叛。朝廷之不可敵。三尺豎子。亦能知之。關東男兒。豈不知之哉。惟自武門專權。封建成勢。君臣之義已熟。興亡之際。實有不得已者矣。中世以後。左右相爭者。各爲其君。其事固非關於朝廷也。不問其勢。而唯義之辨。是猶依木而求魚也。真齷齪拘儒之辨矣。不可與語志士仁人之義也。抑壬戌以後。我藩起而執事。得預於天下之大機。當是時。已不能扶弱府。以振神州之氣。是固不能辭其責也。然及至戊辰東北之舉。豈得已哉。就其事而察其情。其苦心不言亦可知也。天下識者已明之。不待喋喋辯之也。幽囚無事。屏居默坐。因徐憶從前之事。實有不堪痛哭流涕者矣。嗚呼。君臣離隔。一死且不可得全。每一望蝦夷之地。未嘗不血淚沾臆也。感慨之餘。取京師以後之事而錄之。時寒風凜冽。滿山積雪。戎衣弊裂。寒威穿身。投

碑
銘

忠哉義哉桑名士民守節取義各殉其難鄉黨追慕建碑招魂
嗚呼忠節永照千春明治廿年十二月正四位松平定敬撰并書



故桑名藩士森君殉難旌節碑

故桑名藩士森君殉難旌節之碑

正四位松平定敬篆額

精忠苦節

明治廿二年二月十一日勅命煥發大赦天下而故桑名藩士森君與焉同鄉士民感激不已乃相謀建碑于桑名城址招魂社側以旌君之忠節君諱陳明通稱彌一左衛門桑名藩世臣也元治慶應之際藩主松平晴山公奉職于京師君輔公周旋盡力於朝廷既而戊辰之事起桑名藩亦獲罪及事平朝廷問罪首君奮當之從容伏刑于東京時年四十四葬于東京深川靈巖寺塋域實明治二年己巳十一月十四日也舊藩士民莫不悼惜抑元和寬永以來桑名藩養士二百有餘年一旦臨其難君以一身贖闔藩之罪使其君臣血食不斷則如君者豈可不謂烈丈夫乎宜矣同鄉士民之追悼欽慕彌久彌不已也先是明治十五年晴山公樹碑于君之墓上今茲公又應同鄉士民之請親題碑額曰精忠苦節以表之嗚呼可謂君死而有餘榮矣頃日桑名父老諸君託正武以碑文正武辭謝而不得乃據父老諸君之所傳及舊藩主家文書謹叙森君晚節之要領云

明治廿三年二月

桑名 晚生小山正武謹撰並書

泣血錄附錄

舊桑名藩士戊辰殉難者氏名

正月三日於城州下鳥羽戰死

岩崎卓爾

新居良次郎

山內金次郎

富士田忠五郎

富士田領左衛門

岡鉦左衛門

面川修輔

渡部多總右衛門

同日負傷後於紀州某地死

西野常藏

四月十九日於野州宇都宮戰死

笹田銀次郎

岩崎彌五郎

不破彈藏

高見民藏

岡正三郎

小林權六郎

同日於野州安塚戰死

神山金次郎

四月廿七日於越後鯨波戰死	駒木根元一	同日於越後柏崎某地亂軍之際失蹤	小出冬次郎
同日負傷廿八日於半田村死	平野吉五郎		余語代橘
同日於鯨波負傷五月一日於妙法寺村死	三宅厚		
五月十一日於越後朝日山戰死	馬場清次	五月十三日於朝日山戰死	本田龍藏
五月十一日於越後妙見山負傷同日死	河村善左衛門	五月十三日於朝日山負傷同日死	戶狩金吾
五月十三日於朝日山負傷	山添仙司		
七月二日於會津若松死	畑三八郎	五月十九日於長岡負傷	高崎清次郎
五月十九日於越後長岡負傷	阪勇右衛門	七月五日於若松死	
七月九日於會津若松死	高野一郎右衛門		
五月十九日長岡落城之際失蹤	川本惣兵衛		
五月十五日於江戶上野戰死	杉田件藏		
	細谷又之丞		
五月廿三日於越後與板領戰死			松野龜若

五月廿八日於越後元與板戰死	軍 監 鈴木右衛門七	五月廿九日於越後與板領大山戰死	清水良助	同日於同所負傷九月廿五日於出羽莊內死	關矢金右衛門	同日於同所負傷九月廿五日於會津死	山内半平
六月一日於越後備後山戰死	副隊長 大平九左衛門	六月二日於北野村戰死	小森民五郎	六月十一日於越後大山戰死	大村一郎治	六月十一日於越後大山戰死	三輪爲藏
六月十一日於越後大山戰死	副隊長 馬場三九郎	六月十一日於越後大山戰死	村田鍊太郎	六月廿四日於越後木目嶺戰死	中島角左衛門	六月廿七日於越後大山戰死	梶川彌左衛門
六月廿八日於越後加茂町病死	鈴木彌三郎	六月廿八日於越後加茂町病死	鈴木彌三郎	七月十四日於越後大山負傷	鈴木彌三郎	七月十四日於越後大山負傷	前田專次郎
七月廿二日於越後秣村脇山戰死	玉井五郎兵衛	七月廿二日於越後秣村脇山戰死	玉井五郎兵衛	八月二日於越後三條	玉井五郎兵衛	八月二日於越後三條	吉岡盛之助
八月四日於越後加茂町戰死	豐田喜右衛門	八月四日於越後加茂町戰死	豐田喜右衛門		豐田喜右衛門		不破專次郎
八月廿三日於會津馬喰町戰死	椽尾恕三	八月廿三日於會津馬喰町戰死	椽尾恕三		椽尾恕三		副隊長 鳥飼次郎

軍 監 中村 藤 六	上月 龜 太郎
軍 監 和 田 勝 太 郎	淺 野 五 郎
淺 井 照 彌	佐 藤 鉦 藏
米 富 繁 右 衛 門	小 柳 佳 郎
品 田 金 八	五十 嵐 藏 右 衛 門
小 澤 源 三 郎	加 藤 鑄 介
岩 崎 助 次	田 中 久 榮
同日負傷於出羽山形死 檜原死	
小 寺 清 維	
同日負傷九月廿二日 於莊內死	
島 田 三 五 郎	
八月廿六日於高久川溺死	
河 村 正 治	
九月廿日於出羽塞河江戰死	
軍 監 三 谷 卯 之 右 衛 門	軍 監 谷 三 十 郎
山 脇 仲 右 衛 門	軍 監 淺 井 金 五 郎
	岡 安 榮 之 進

軍 監 町 田 鎌 五 郎	宇 都 野 新 兵 衛
金 子 覺 彌	梅 澤 宗 助
長 瀬 金 太	田 中 兼 五 郎
伊 藤 喜 三 郎	久 松 三 郎
杉 村 安 藏	泉 甲 之 助
樋 口 次 左 衛 門	
九月廿日負傷十一月廿六日 於出羽大山死	同日負傷 月 日同上
不 破 右 門	長 島 民 藏
於越後與板在陷敵圍中 於出羽大山死	於出羽山形在屠腹
伊 東 金 八 郎	岡 田 平 右 衛 門
於越後長岡在病死	於三州山下自刎
佐 藤 元 助	岡 本 藏 太
九月廿九日於莊內大山病死	
岡 本 作 十 郎	
十一月晦日於箱館病死	於箱館戰死
佐 治 寬	竹 內 武 雄
三月 日於江戶靈岸寺屠腹	閏四月 日於越後柏崎 大久保殉難
岡 本 雅 次	吉 村 權 右 衛 門

正月	日於桑名城 <small>中殉難</small>	山本	主馬	同上	小森九郎 <small>右衛門</small>
明治二年正月十一日	於莊內	渡部	淺右衛門	三月廿五日	同上
病死		柄田彌一	右衛門	於莊內	自殺
七月三日	於羽州小花澤	病死			
十一月十三日	於東京深川	靈岸寺	殉難	就刑	死
首謀者		森	彌一	左衛門	

總計百零九人

明治三十三年四月五日印刷
 明治三十三年四月八日發行

編輯者 兼 發行者
 江 間 政 發

東京市日本橋區兜町二番地
 東京印刷株式會社

印刷者 長谷川 正直

印刷所 東京市日本橋區兜町二番地
 東京印刷株式會社

